

**ԳԵՐՄԱՆԻԱՅԻ ԴԱՇՆԱՅԻՆ ՀԱՆՐԱՊԵՏՈՒԹՅԱՆ ՓԱՍՏԱԲԱՆՆԵՐԻ ՊԱԼԱՏԻ  
ՆԵՐԿԱՅԱՑՈՒՑԻՉՆԵՐԸ ՀՅՈՒՐԸՆԿԱԼՎԵԼ ԵՆ ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ  
ՓԱՍՏԱԲԱՆՆԵՐԻ ՊԱԼԱՏՈՒՄ**

10.12.2015 11:20



Հայաստանի Հանրապետության փաստաբանների պալատում երեկ՝ դեկտեմբերի 9-ին, հյուրընկալվել են Գերմանիայի Դաշնային Հանրապետության փաստաբանների պալատի պատվիրակությունը: Հանդիպումը կազմակերպել է Միջազգային իրավական համագործակցության գերմանական հիմնադրամը (IRZ):

Պատվիրակության կազմում են եղել Գերմանիայի Դաշնային Հանրապետության փաստաբանների պալատի գործադիր տնօրեն Վերոնիկա Հորերը, իրավական հարցերի հանձնաժողովի նախագահ Օտմար Քուրին, ինչպես նաև IRZ-ի ներկայացուցիչ Ֆրանցիսկա Զիմոնը:

Փաստաբանների պալատի նախագահ Արա Զոհրաբյանը ողջույնի խոսքում կարևորել է երկու երկրների փաստաբանական համայնքների միջև համագործակցությունը՝ նշելով, որ գերմանացի գործընկերների հետ սա արդեն երկրորդ հանդիպումն է (առաջինը եղել է 2015թ. նոյեմբերին Թբիլիսիում), որտեղ կողմերի քննարկման արդյունքում պարզ է դարձել, որ երկու երկրներում էլ (Հայաստան, Գերմանիա) փաստաբանների խնդիրների ու մարտահրավերների էությունների միջև կան ընդհանրություններ: Գերմանացի գործընկերներին ներկայացվել է ՀՀ փաստաբանների պալատի կառուցվածքը, ինչպես նաև Հանրային պաշտպանի գրասենյակի և փաստաբանական դպրոցի գործունեությունների ուղիները:

ԳԴՀ փաստաբանների պալատի գործադիր տնօրեն Վերոնիկա Հորերը Գերմանիայի 165.000 փաստաբանների անունից ողջունել է փաստաբանների պալատի ներկայացուցիչներին և նշել է, որ դաշնային պալատի իրավական հարցերի հանձնաժողովի նախագահ Օտմար Քուրին հանդիսանում է քրեական գործերով Գերմանիայի լավագույն փաստաբաններից մեկը, ինչպես նաև ղեկավարում է Համբուրգ քաղաքի տարածաշրջանային փաստաբանների պալատը:

Պարոն Օտմար Քուրին իր ելույթում ներկայացրել է Գերմանիայում փաստաբանական գործի զարգացման պատմությունը: Նրա խոսքով, նախկինում փաստաբանները գտնվում էին պետության հոգածության ներքո, սակայն հետագայում պետությունը փոխանցել է այն փաստաբանների ինքնակառավարմանը:

Գերմանիայում գործում են 28 փաստաբանական պալատներ, որոնք հավասարեցված են  
Գերմանիայում գործող դատարանների թվին: Այդ 28 փաստաբանական պալատներից միայն 6-7 են առավել խոշորները:

Գերմանացի գործընկերներին հետաքրքրել է Հայաստանում փաստաբանների ժողովի կազմակերպման առանձնահատկությունները, քանի որ տարածաշրջանային պալատներում շատ դժվար է լինում կազմակերպել ընդհանուր ժողովներ: Չեն կարողանում նույնիսկ ապահովել փաստաբանների 10 տոկոսի մասնակցությունը:

Հայկական կողմը ներկայացրել է Հայաստանի փաստաբանների պալատի ընդհանուր ժողովի կազմակերպման և անցկացման հեռակա կարգը, որի ընթացքում յուրաքանչյուր ընտրող փաստաբան հնարավորություն է ունենում ամբողջ օրվա ընթացքում գալ և գաղտնի քվեարկության միջոցով իր դիրքորոշումը հայտնել՝ նախապես ներկայացված օրակարգային հարցի կամ նախապես գրանցված թեկնածուի վերաբերյալ, ինչը մեծացնում է ընդհանուր ժողովին փաստաբանների մասնակցության հնարավորությունը:

Համբուրգի փաստաբանների պալատը, ըստ գերմանացի գործընկերոջ, կառավարվում է փաստաբանների ընդհանուր ժողովի կողմից ընտրված վարչության 24 անդամների և վերջիններիս կողմից ընտրված նախագահության կողմից: Պալատն ունի 10.000 անդամ: Գերմանիայի փաստաբանների անդամավճարի տարեկան գումարը կազմում է 280 եվրո, որը վճարվում է տարեկան կարգով՝ նախապես:

Հայաստանի փաստաբանական դպրոցի տնօրեն Սիմոն Բաբայանը և ՀՀ փաստաբանների պալատի ֆինանսական տնօրեն Իրինա Փիլոյանը ներկայացրել են Հայաստանի Հանրապետության փաստաբանության մասին օրենքը և դրանից բխող կարգավորումները:

Այսօր՝ դեկտեմբերի 10-ին, հայ փաստաբանները գերմանացի գործընկերների հետ միասին քննարկելու են ‘Պաշտպանի դերը նախաքննության և դատաքննության ընթացքում’ թեմային առնչվող հարցեր՝ վերապատրաստման դասընթացի շրջանակում:







Վերադառնալ \$(window).load(function(){ if(typeof \$(".fb\_comments\_count").html() != "undefined" && parseInt(\$(".fb\_comments\_count").html()) != 0){ updateCommentsCount(window.location.href); } })